

## गलाति पट्टोर विस्वसिरेनाह्कु, किर्स्तुना बळयि पोलु लोहतद सीटि

इद सीट्टुन रासवाल येसुना बळयि पोलु आंदोग. पोलु इद सीट्टुन, गलाति पट्टोर विस्वसिरेनाह्कु रासतोग. ओरगा वेल्लाटोर यहुदि आयवोर मतोर. इद सीटि बाराह्कु रासतोग इतेके, अद तूकने जोल काग्हावालोरो यहुदिर, गलाति पट्टोर विस्वसिरगा वातोर. वासि, तमाड अडोड (मोसा मुय्तोग वेहच मतपु, तमाड मेंदुस्कने डायना रिवज कीयनदु, तिडटाड अडोड, पोल्वा-पंडुमताड अडोड) माळलाह पोकुर कींदुर. माळवालेवा मीटु देवुळता मुनेह सेतेमतोरिर आया पगविर इनजोर ओर इंदुर. अदिनेनाह्कु पोलु यहुदि काग्हावालोरा पोगोन ओड आतोग. ओसो गलातितोर विस्वसिर ओराड केंजिस नमिस मतोर, इदिन केंजिसि पोलुह्कु पका दुकम आता. अदिनेनाह्कु पोलु गलातितोरिन तेळियिह कीयलाह, इद सीटि रासतोग.

पोलु सीट्टुगा इह इन्हतोग इतेके, नना पोकुर कीयनद कबुरिये, बेसता कबुर आंदु; इद कबुर नाकु मन्कना मेटे दोर्को मति, किर्स्तुये नाक तेन पुन्पिह कीतोग. ओसो येसु किर्स्तुन विस्वस केवालोरु, मोसानाड अडोना कय इन्न इलेर; अव अडोड सिरप मन्कना पापमतुने तोहतहताड. मति मन्कलोर येसु किर्स्तुन विस्वस कीतेकेन, सेतेमतोर आस्तोर. येसुना मेटेने ओर विस्वसिर विस्वसते निच मन्हतोर इनजोर, पोलु इद सीट्टुगा वेहतहतोग. ओसो देवुळता जीवा माक ताकिह कीतपु, माट ताना पेग्के ताकना गावले, ओर्विह्कु-ओर्वोग जीवा कीसि सेवा-साकुर कीयना गावले.

1 नना पोलुनन, येसु किर्स्तुना बळयिनन, ✧ ननाये इद सीटि रासवानन. नना मन्कना कयदे बळयिनन आयोन, ओसो मन्कना मेटे वने बळयिनन आयोन; मति येसु किर्स्तु, ओसो वेन हामुरताहि तेग्किह कीतोग देवुळबाबाल, वेरे इर्वुर नाकु बळयि आयनोग इन्जि तासतोर. ✧

2 मीट गलाति पट्टे मनवालोर किर्स्तुना मुडोरिर, ✧ मीके इद सीटि रासिहनन, इगा मनवालोर विस्वसिरा संगे ऐगेन कलियिस, इद सीटि रासिस लोहतहनन.

✧ 1:1 1:1 रोम सहरतोर 1:1; तीतुस 1:1-4 ✧ 1:1 1:1 बळयिर 9:15 ✧ 1:2 1:2 बळयिर 16:6; 1 कुरिततोर 16:1

3 मावा देवुळबाबाल, ओसो मावा सामि येसु किर्स्तु, वेर इर्वुर मीकु देव्या ईयिर, सुकम ईयिर.✧

4 येसु किर्स्तु मावा पापमता सिक्सा एचि, हव्कनागुटातगा तना जीवा ईतोगा इन्जि, मीट पुतिर.✧ माट इद दुनियाताड लाग्वाड विचर्कनाहि, लाग्वाड कबस्कनाहि पिहट अरयना इन्जि, मावा देवुळबाबाना विचर मता.✧ अदिनेनाहक येसुसामि तना जीवा ईतोगा.

5 ओन्क सबेटोर अमेसा-अमेसातुहक मान ईयिर.✧आमेन!

उंदिय बेसता कबुर आंदु

6 पया अचोन चट्टिपट मीटु देवुळतुन पेगके कीतिर इतेके! बेद देवुळ मीकु किर्स्तुना दयाते मनदलाह केयता,✧ ताना बेसता कबुरतुन पोहचि, बेदो दुस्त्राय अलगता कबुरतुन नमतिर अले!✧

7 अद कबुर इतेके बेसतल आयो मति, मीक लेसिह केवालोर बोर मन्हतोर, ओर तान बेसता कबुर इन्जि, किर्स्तुना सेतेमता कबुरतुन मिळहतलाह ऊळिहतोर.✧

8 मति माट मीक कागहतद पोल्लोतुन विळिससि, दुस्त्रा अलगता पोल्लो बोगाय मीक कागहतेके, देवुळ ओन बूळे कीयि! माट कागहतेक वने, पोगोटा देवतुल कागहतेक वने,✧ अद्रमतोन देवुळि बूळे कीयि!

9 माट मुने मीक वेहच मतोम, इंजेक ओसो नना सीता कीसीयहनन, बेस केंजाटु. मीट मुने नमतद बेसता कबुरतुन विळिससि, अलगता कबुर मीक बोर वेहतहतोर, ओरिन देवुळि बूळे कीयि.✧

10 बह इंजेके लोकराहि मान दोर्कना इन्जि, नना ऊळिहनना? बारा देवुळता देव्या दोर्कना?✧ बह मन्कलोरिन नना गिर्दा केवानन आयहनना? मन्कलोरिन नना गिर्दा केवानन आस मतेके, किर्स्तुना कय इळन✧ नना मनोन आवेनन.

पोलु वेहतद कबुर देवुळता आंदु

✧ 1:3 1:3 रोम सहरतोर 1:6-7 ✧ 1:4 1:4 योहन 1:29; गलातितोर 2:20; 1 तिमोति 2:6  
 ✧ 1:4 1:4 रोम सहरतोर 12:2; इपिससतोर 5:16; 1 योहन 5:19 ✧ 1:5 1:5 रोम सहरतोर 11:36 ✧ 1:6 1:6 रोम सहरतोर 8:28; गलातितोर 5:8 ✧ 1:6 1:6 2 कुरिततोर 11:4; गलातितोर 2:2,5,14; 1 तिमोति 1:3-4 ✧ 1:7 1:7 बळयिर 15:24; 2 कुरिततोर 11:13; गलातितोर 2:4; 5:10 ✧ 1:8 1:8 2 कुरिततोर 11:14 ✧ 1:9 1:6-9 रोम सहरतोर 16:17; 2 कुरिततोर 2:17 ✧ 1:10 1:10 1 तिसलुनितोर 2:4 ✧ 1:10 1:10 रोम सहरतोर 1:1; पिलिपितोर 1:1

11 मावोरिर, बेस केंजाटु! बेद बेसता कबुरतुन नना मीक वेहच मतन, अद मन्कना बुदता आयो.✧

12 मन्कनगडाहि नना इद कबुरतुन केंजोन, मन्कनगडाहि नना कगयोन वने. मति नाकु येसु किस्तुये अदिन पुन्पिह कीतोग.✧

13-14 (नाकु मन्कनगडाहि इद बेसता कबुर दोर्को, मति किस्तुनगडाहे दोर्कता इतेके,) यहुदि जाततोरगा नावा मुनेटा मनमुळता लोप्पा मीट केंजिस मतिर.✧ नना अस्के देवुळता मुडुन पकाय कुळसा अंदन. ओरिन बूळे कीयलाह ओरा पेगके दल्गिस मंदन.✧ मावा यहुदि रीतरिवजतुन माळलाहि, नावा ऐगेटोरिहकाय वीळिस बेचोनो मुनेह मंदन. इतेके नावाड मुनेतोर तादोर-बाबोर कागहतनाड उतुर्क कगयलाहि, नावा पकाय जिदि मंदु, इदिन मीट पुतिर.✧

15-16 पया बेद देवुळि तना देव्वाते नना पुटनामुनेन नाक आचता, आचिसि दुसाड-दुसाड देसेहकनोरगा, ताना मगि येसु किस्तुना बेसता कबुर वेहतना इन्जि नाकु केयता,✧ इदे देवुळि नाकु तना मगिन पुन्पिह कीयलाह, विचर कीता इन्जि, मीट पुतिर.✧ अस्के नना बोनगाने बुदिड ताल्हकलाह अनोन;

17 अहे नाकाय मुने बळयिर आतोरिन कलियलाह, येस्सलेम सहरतके अनोन.✧ मति दमिस्क सहरताहि अरब देसेमते अन्जि,\* अगा गळके बह मन्जि, दमिस्क सहरतके ओसो मल्स वातन.

18 ताना पया मूंड वर्साड आनेके, पत्रुन कलियलाह नना येस्सलेमतके अन्जि,✧ ओनगा पंद्रा दियाड मतन.

19 दुस्रोर येसुनाड बळयिरिन इतेके, नना ऊळोन मति, सिरप येसुना तमोग याकुबिये कलियतोग.✧

✧ **1:11 1:11** 1 कुरिततोर 3:4; 9:8 ✧ **1:12 1:12** 1 कुरिततोर 2:9-10; 11:23; 2 कुरिततोर 12:1; गलातितोर 2:2 ✧ **1:13-14 1:13-14** बळयिर 26:4-5 ✧ **1:13-14 1:13-14** बळयिर 8:3; 9:21 ✧ **1:13-14 1:13-14** बळयिर 22:3-5 ✧ **1:15-16 1:15-16** यशायाह 49:1,5; यिर्मयाह 1:5; बळयिर 9:15; रोम सहरतोर 1:1; 8:28; गलातितोर 2:9 ✧ **1:15-16 1:15-16** 1 तिमोति 1:13-14 ✧ **1:17 1:17** बळयिर 9:20 \* **1:17 1:17** इद अरब देसेम बेगा मन्हता इनजोर पुनदलाहि, रोम राजेमता नक्सातुन ऊळट. इगा वेल्लाटोर नोहाना कुट्टमळतोर, अब्रहमना कुट्टमळतोर, एसाना कुट्टमळतोर मतोर. वेर अरब देसेमते अलग-अलग एरियाने मतोर. अद देसेमता बूमि पेळ्हकल बूमि मता, पोलम कीयलाह ओप्पो आंदु, अदिनेनाहक अण्डोर लोकर, उंद जागातगडाहि दुस्रा जागाते अन्जि, तमाड ऍड-गोरैन मेहवालोर-कोपालोर मतोर. ✧ **1:18 1:18** बळयिर 9:22-26 ✧ **1:19 1:19** मार्कल 6:2-3; बळयिर 12:17

20 देवुळता मुनेह किरिया कीस वेहतहनन, नना बेव मीक रासतन, अचु जोल आयोड, निटमताडे!✧

21 ताना पया नना सुरिया, किलिकिया†, अव पटिनके अतन.✧

22 इंजेके नाकु यहुदा पटटे मनवालो किरिस्तुना मुल✧ बेस्केन कलियोर आसि, ओसो ओर नाक पुनोर वन आसि.

23 नाक पुनोर तेला मति, “बोग मुने माक विस्वसिरिन पका तिपल कीदोग, येसुना कबुरतन माय्पिह कीयलाह ऊळिंदोग, अदे कबुरता पोकर इंजेक ओग कीसोर मन्हतोग!”✧ इनजोर, नावा लोप्पा यहुदा पटटोर विस्वसिर केंजिंदुरे.

24 केंजिसि, नावा साक्सितुहक देवुळतुन जोहर कीदुर.

## 2

मुनेतोर बळयिर पोलुन बळयि इनजोर मानेम आस्तोर

1 ताना पया चोव्दा वर्साड आनेके, नावा ऐगेदोग बार्नबसना संगे,✧ नना ओसो येस्सलेमतके अतन,✧ अस्के नावा तोळतोग तीतुसिन वने माट पोस अतोम.✧

2 अगा देवुळिये नाक ओसीताहकु नना अतन.✧ अन्जि अगडोर विस्वसिरगा, बोर मोदुल मन्कलोर मन्हतोर, ओरगा अतन. दुस्साड जातिनोरगा नना कागहतद बेसता कबुरतन,✧ ओरिन ओर्के एगिह कीस वेहतन. निमा कागहतद कबुर देवुळतगडाहे वाता इनजोर, ओर पेदल्क नाक इनदनुर बहे; अस्के नावा पूरा कहटेम उगसे अनो आयगा इन्जि, नावा आसा मता.✧

3 मति नावा तोळतोग तीतुस,✧ यहुदि आयवोग मतोग तेला मति, वेन इंका यहुदिरा डायना रिवज नोमलाह जबर्दस्ति केवोर.

4 इद पोल्लो बह पुटटा इतेके, अगा सोड केवालो जोल विस्वसिर वास मतोर.✧किरिस्तु येसु बेद्रम माकु यहुदिराड अडोनगडाहि विळिसह कीतोग,✧ ताना

✧ **1:20 1:20** रोम सहरतोर 9:1-3; 2 कुरिततोर 1:23; 11:31 † **1:21 1:21** किलिकिया पोलुना नाग, तरसुस सहर, किलिकिया पटटे मता. ✧ **1:21 1:21** बळयिर 9:30 ✧ **1:22 1:22 1** तिसलुनितोर 2:14 ✧ **1:23 1:23** बळयिर 9:21 ✧ **2:1 2:1** बळयिर 4:36-37 ✧ **2:1 2:1** बळयिर 11:30; 12:25 ✧ **2:1 2:1 2** कुरिततोर 2:13 ✧ **2:2 2:2 1** 1:12 ✧ **2:2 2:2 1** 1:6 ✧ **2:2 2:2** पिलिपितोर 2:16 ✧ **2:3 2:3 2** कुरिततोर 2:3; 8:23 ✧ **2:4 2:4** बळयिर 15:1; 2 कुरिततोर 11:26; गलातितोर 1:7 ✧ **2:4 2:4** 5:1,13; याकुब 1:25

आयडा गुंजलाहि, ओर कुस्क्ने नेडिस मतोर. ✧ माटु ओरा पोल्लोतुन केंजिसि, अव अडोने ओसो ताकना, इद्रमताये विचरते वातोर. ✧

5 मति ओरा पोल्लोतुन माटु मुर्तिय केंजोम! मीट गलातितोरिर येसुसामिना सेतेम कबुरतुन विळसनदायो इन्जि, ✧ ओरा पोल्लोतुन माटु मुर्तिय केंजोम!

6 पया ओर मोदुल मन्कलोर इतेके — ओर मुनेताहि पेदल्क आंदुर, तान नना मुर्तिय सीता केवोन. ✧ अहे मोकम ऊळिसि, देवुळि मन्कहक कदर एवो. ✧ नना काःहतद बेसता कबुरतगा, ओर बेदे पोल्लो मिळहतलाह वेहोर.

7 (मति याकुब, ✧ पत्रु, योहन, वेर मुवुरिन येस्सलेमते येसुसामिना मुडगा मुक्यालोर इन्हतोर, वेर बाताल कीतोर?) बेद्रम पत्रुहकु, देवुळि यहुदिरिहक\* बेसता कबुर वेहतलाह अदिकर ईता, अद्रम नाकु यहुदि आयवोर दुस्माड जातिनोरिहक वेहतलाह अदिकर ईता ✧ इन्जि, वेर मुवुर ऊळतोर.

8 इतेके बेद देवुळि डायना रिवज माळवालोर यहुदिरगा, तना बळयि आयलाह पत्रुहक लाव ईता, अदे देवुळि दुस्माड जातिनोरगा दायलाह, नाक वने लाव ईता.

9 ओसो बेद्रमता देव्या नाकु देवुळ ईता इन्जि, ✧ वेर मुवुर मुक्यालोर पुतोर. देवुळ नाकु इद्रमता अदिकर ईता, देव्या ईता इन्जि, वेर नाकु ओसो बार्नबसिनु गोत ओग्लिसि, मावा संगे करल कीतोर. इतेके माटु इर्वोम दुस्माड जातिनोरगा सेवा कीयना, ✧ ओर बार यहुदिरगा सेवा कीयना इनजोरे.

10 “(मीट यहुदि आयवोरक्के अन्हटु,) मति मावोर गरिब यहुदिरिन मात्रम सीता कीम्हटु,” इन्जि ओर इतोर. अद्रमे कीयलाह, नाक वने गिर्दा मंदु. ✧ (इद्रम ओर मुवुर मुक्यालोर नाक करल कीतोर.)

### पोलु पत्रुन तेर्हतह्तोग

11 मनेक मनेक पया पत्रु\* अंताकिया सहरते ✧ वातोग. ओग (अगा बेचोको दियाड मनेके) बेरा उंद तप कीतोग! ओग तपिस मताहकु, ओना मोकम मुनेह नना

✧ 2:4 2:4 2 पत्रु 2:1; यहुदाल 3-4 ✧ 2:4 2:4 रोम सहरते 8:15; 2 कुरिततोर 11:13,20

✧ 2:5 2:5 1:6; क्लुसितोर 1:3-5 ✧ 2:6 2:6 2 कुरिततोर 11:5; 12:11 ✧ 2:6

2:6 बळयिर 10:34 ✧ 2:7 2:7 बळयिर 12:17 \* 2:7 2:7 यहुदिरिहक मोदुल कागिदते

“डायना रिवज कीतोरिहक”. ✧ 2:7 2:7 1 कुरिततोर 9:17; 1 तिसलुनितोर 2:4; 1 तिमोति

1:11 ✧ 2:9 2:9 रोम सहरते 12:3 ✧ 2:9 2:9 1:15-16 ✧ 2:10 2:10

बळयिर 24:17 † 2:11 2:11 पत्रु मोदुल कागिदते “कय्या”. पत्रुहक रेंड पेदिर्क मताड: इब्रि

पोल्लोते कय्या; युनानि पोल्लोते पत्रु. ✧ 2:11 2:11 बळयिर 11:19; 15:1

ओना अडम वळ्हकतन.

12 इद बेद्रम आता इतेके, अस्के येस्सलेम सहरताहि याकुबनेनाह वातोर उयतुर मन्कलोर अगा वास मतोर. ओर वायनामुने, पत्रु यहुदि आयवोर विस्वसिरा बतते उदिस गाटो तिंदोग.✧ मति ओर येस्सलेमतोर वातापया, ओग यहुदि आयवोरिन जेक तासलाह बोटटोग, ओरा संगे उदोग आंदोग. डायना रिवजता पोकुर केवालोर तुंगातोरिहक रेयिस,✧ ओग इद्रम कींदोग.

13 ओसो ओन ऊळिसि, मावा यहुदि जाततोर दुप्रोर विस्वसिर वने, अद्रमे सोड कीतोर. अदिहक बार्नबस इंका सोड केवालोर संगे कलियलाह बोटटोग.

14 कलियिस तेला मति, वेर देवुळता सेतेम कबुर वेहतपु ताकोर आंदुर,✧ तेन ऊळिसि नना कतमतोर मुनेह पत्रुन तेर्हतन.✧ “निमा इतेक यहुदिनिन आस तेला, किर्स्तुनगा वाताहकु यहुदिराड अडोन विळिसिसि, यहुदि आयवोर लेहकाने तार्किदिन;✧ मति इंजेके दुस्रा जाततोरिन निमा बेद्रमि मावा यहुदिराड अडोड नोमलाह जबर्दस्त कीय्हनिन?‡

15 “माट यहुदिरल दुस्रा जाततोरल आयवल (ओरिन पाप्यहलोर इन्हतोर, ऊळविन!),✧ माटु यहुदि जातते पुटटल, अयो?✧

16 इंजेके मोसानाड अडोन माळतेक आयो, मति किर्स्तुना पोगोन विस्वस तासतेकेने, देवुळि माकु सेतेमतोर इन्हता.✧ बह इतेके अडोन माळताहकु, बोगे देवुळता मुनेह सेतेमतोग आयोग इन्जि, सास्त्रम वेहतहता.✧ अडोन माळतेक आयो, मति येसु किर्स्तुना पोगोन विस्वस तासतेकेने, देवुळि मन्कनु सेतेमतोग इन्हता इन्जि पुताहकु,✧ माट यहुदि विस्वसिरल इंका किर्स्तु येसुना पोगोन विस्वस कीतल.

17 पया किर्स्तुन विस्वस कीसि, माट सेतेमतोर आयलाह ऊळिहनल, (अह आसि माट किर्स्तुन विस्वस केवालोरल, दुस्राड जातिनोरा संगे उदना-तेदना कीय्हनल. इद्रम कीसोर मनाहकु,) लोकुर माकु पाप्यहलोर इन्हतोर इतेके,✧ बह किर्स्तु पापमतुन बोलिंह कीयलाह वातोग इनजोर इहनिना? अद्रम मुर्तिय आयो!

✧ 2:12 2:12 बळयिर 11:3 ✧ 2:12 2:12 बळयिर 11:2 ✧ 2:14 2:14 1:6;

कुलुसितोर 1:3-5 ✧ 2:14 2:14 1 तिमोति 5:20 ✧ 2:14 2:14 बळयिर 10:28

‡ 2:14 2:14 यहुदिराड अडोड वेहतपु, यहुदि आयवोरा संगे तिनदना पोले आंदु. ✧ 2:15 2:15

1 शम्पूल 15:18; लूकाल 24:6-7 ✧ 2:15 2:15 पित्तिपितोर 3:5 ✧ 2:16 2:16

रोम सहरतोर 3:21-23; 9:30 ✧ 2:16 2:16 देवुळताड पाटाड 143:2; रोम सहरतोर 3:20

✧ 2:16 2:16 बळयिर 13:39; गलातितोर 3:11,24; इब्रितोर 7:18-19 ✧ 2:17 2:17

बळयिर 11:2-3

18 बेदिन नना मुने लेहच पोहतन, अदिन ओसो नना निल्पिह कीतन इतेके, नना कसुरतो नने इन्जि तोहतहनन.

19 बह इतेके, मुने यहुदिराड अडोन माळसोर-माळसोर, नना पिसलाह ऊळिंदन. मति इंजेके देवुळतेनाहके पिसना इन्जि, नना अव अडोन लेहच पोहतन. इतेके नना अडोहकु डोलतप लेहकाने आतन. ✧ किर्स्तुना संगे हक्कनागुटातगा वेळहतप लेहकाने आतन. ✧

20 हक्कनागुटातगा वेळहतप आतन इतेके, नना जीवात बह मनदकन? आयो, नावा पाळना जीवा हाता, ✧ इंजेके किर्स्तुना जीवाये नावा लोप्पा जागा आता. ✧ पया इद मेंदुदगा नना जीवात महनन इतेके, देवुळता मगि किर्स्तुना पोगोन विस्वस कीसिये पिसिहनन. ✧ ओगे नाकु जीवा केवाल, ✧ नयेनाहकु तना जीवा एवाल आंदोग. ✧

21 यहुदिराड अडोन नोमताहकु, देवुळ माकु सेतेमतोर इता इतेके, किर्स्तु मयेनाहकु हास पया बाताल पायदा? ✧ मति ओग हाताहके, देवुळता दया माकु दोर्कता इन्जि, अद दयातनु पेके तासिसि, नना मल्स अडोनके अनोन.” (इद्रमि येसुसामि नाकु पुन्पिह कीतव इव पोल्लोड नना पत्रुन वेहतन.)

### 3

#### विस्वस कीतेकेने मन्कलोर सेतेमतोर आस्तोर

1 ए गलातितोर बुदलेवोरिर! येसु किर्स्तुहकु बेद्रम हक्कनागुटाता सिक्सा दोर्कता, अवटे माक बह अमेसाता पिसमुळ दोर्किहता, ✧ इदिन मीकु नना पिडम-पडम वेहच मतन. इतेके बोरो मति (मीक अडोने ताकलाह कागहचि) मूसेड कीतोरे, इद बेस आयो!

2 इद उंदिय पोल्लो नाक मीट वेहाट्ट! देवुळि तना पवित्र जीवातुन मीक बह ईता, मीट अडोन माळताहकु ईताया, बारा किर्स्तुनाड केंजिसि, विस्वस तासताहकु ईता? ✧

✧ 2:19 2:19 रोम सहरतोर 7:4,6; 1 कुरिततोर 9:20 ✧ 2:19 2:19 5:24; 6:14

✧ 2:20 2:20 2 कुरिततोर 5:14; मिलिपितोर 3:10-11 ✧ 2:20 2:20 रोम सहरतोर 6:6;

8:10; गलातितोर 5:24; कुलुसितोर 3:4 ✧ 2:20 2:20 रोम सहरतोर 3:21-23; 8:10;

14:7-8 ✧ 2:20 2:20 रोम सहरतोर 8:37 ✧ 2:20 2:20 रोम सहरतोर 5:6,8; 8:37;

गलातितोर 1:4 ✧ 2:21 2:21 1 कुरिततोर 1:17; गलातितोर 3:21 ✧ 3:1 3:1 1

कुरिततोर 1:23; गलातितोर 5:11 ✧ 3:2 3:2 रोम सहरतोर 10:17; इब्रितोर 4:2; 6:4-6

3 मीवा लोप्पा देवुळता जीवा बेद कबळ सुरु कीता, अद कबळतुन इंजेक बह मीट मीवाय लावते मारिह कीय्हनिरा? अचोन मीट बुदलेबोरिरा?

4 (अडोन नोमिसि सेतेमतोरिर आयलाह ऊळिह्निर इतेके,) मीट किस्तुनगा आसा कीताहकु, अचोन तिपल एतिर; अद पूरा उगसेन अताया?\*

5 इतेके देवुळि तना पवित्र जीवा मीक ईस्ता, मियेनाहकु बामिह कीयनाड कबस्क कीस्ता\* बहु? मीट अडोन माळताहकु कीस्ताया, बार किस्तुनाड कैजिसि, विस्वस तासताहकु कीस्ताया?\*

6 (अब्रहममुय्तोग बाताल कीतोग, ऊळविर?)अब्रहम देवुळता पोल्लोतुन नमतोग. ओग नमनदिन ऊळिसि, देवुळि ओन सेतेमतोनिन इता,\* इन्जि सास्रमते रासतद मन्हता.

7 इतेके देवुळता पोल्लोतुन नमवालोरु, विस्वस केवालोरु, वेर अब्रहमना कूळतोरि आंदुरु,\* इदिन सीताते तासाटु.

8 इंजेके विस्वसतुहके, सबे जातिनोर सेतेमतोर आयना इन्जि, मुनेताहि देवुळता विचर मता. मताहकु, अद अब्रहम मुय्तोनु मुनेने इद बेसता कबुर वेहता, सबे जातिनोरिहकु नीवा मेटे बर्कत दोर्कगा,\* इद्रम सास्रमते रासतद मन्हता.\*

9 इतेके अडोन नोमवालोरिहक आयो, मति अब्रहम मुय्तोना लेहका विस्वसते ताकवालोरिहके, देवुळता बर्कत दोर्किहता.

10 बोर अडोन नोमिसि सेतेमतोर आयलाह ऊळिह्नोर, ओर कतमतोरिहक सरपे दल्लिहता. बाराहक इतेके बोरु अडोना पुस्तकते रासतवु, कतम अडोनु नोमसोर मनोर, ओरिहक सरप दल्लिहता,\* इन्जि सास्रमते रासतद मन्हता.\* इद्रमलेहका विस्वसते ताकवालोरिहक बर्कत दोर्किहता, अडोन नोमवालोरिहक बार सरप दल्लिहता.\*

11 इंजेके बोर देवुळतुन नमिसि, सेतेमतोर आयलाह ऊळिह्नोर, ओरि पिसनुर,\* इन्जि सास्रम वेहतहता. अदिनेनाहकु अडोन नोमवालोरगा ओर्विन वने, देवुळि सेतेमतोग इनो, इद्रम सबेटोरिहक दिसिहता.\*

\* **3:4 3:4 1** कुरिततोर 15:2 \* **3:5 3:5 1** कुरिततोर 12:10; इब्रितोर 2:3-4 \* **3:5 3:5** रोम सहरतोर 10:17 \* **3:6 3:6** पुटमुळि 15:6; रोम सहरतोर 4:3,22 \* **3:7 3:7** लूकाल 19:9; रोम सहरतोर 4:16-17; 9:7-9; गलातितोर 6:16 \* **3:8 3:8** पुटमुळि 12:3; 18:18 \* **3:8 3:8** रोम सहरतोर 3:30 \* **3:10 3:10** व्यवस्थाविवरण 27:26 \* **3:10 3:10** रोम सहरतोर 4:14-15 \* **3:10 3:10 2** कुरिततोर 3:7 \* **3:11 3:11** हबक्कूक 2:4; रोम सहरतोर 1:17; इब्रितोर 10:38 \* **3:11 3:11 2:16**



12 अडोन नोमवालोर इतेके, देवुळतगा विस्वस केवाये नोमिहतोर; बोर अडोन नोमिहतोर, अविस्कनेन ताकनुर, ✨ इद्रम सास्त्रम वेहतहता.

13-14 मति दुस्राड जातिनोरिहक इंका, किर्स्तु येसुनगा विस्वस कीताहकु, अब्रहमिहक ईतद बर्कत दोर्कगा. ✨ ओसो देवुळ मुने पोल्लो विळसतपे, ताना पवित्र जीवा माक विस्वसिरिहक दोर्कगा, ✨ इद्रमता विचरते, किर्स्तुये माकु अडोना संगे वातद सरपताहि पिसिह कीतोग. माक सरपताहि पिसिह कीयलाहि, ओग तनाय पोगोन सरप एतोग. ✨ बह इतेके बोगाय मरातगा वेळहतोगु सरपतोग आस्तोग ✨ इन्जि, सास्त्रमते रासतद मन्हता.

### मोसानाड अडोड ओसो देवुळता करल

15 मावोरिर, पुन्चिह कीयनद उंद पोल्लो नना मीक वेहतकन. मन्कलोर कीतद करलतुन वने ताको इनदा वावो, अगा पूनाड पोल्लोड एकवा वाटिसि ताकगा इनदा वन वावो. ✨

16 इंजेके अब्रहम मुयतोहकु, देवुळि पोल्लो विळिसस वेहन्दु, “नीकु ओसो नीवा कूळतोन्कु\* बर्कत ईकन” इन्जि. ✨ इतेके नीवाड कूळतोरिहकु† इंकन इन्जि, देवुळ वेल्लाटोरा लोप्पा वेहो, मति नीवा कूळतोन्कु‡ इन्जि, ओर्विनाये लोप्पा वेहचि. ओग कूळतोग बोग इतेके, येसु किर्स्तुये आंदोग.

17 बेस केंजाटु! अब्रहम मुयतोहकु देवुळ कीतद इद करलतुन इतेके, नालुड नूहकु डेडा वीसा (430) वर्साना पया ✨ ईतव मोसानाड अडोड, बह माय्पिह कीस्ताडा? माय्पिह केवाहकु, देवुळ विळसतद पोल्लो इंजेक वने ताकिहता. ✨

18 अडोन माळताहकु देवुळता बर्कत दोर्कता इतेके, अद बर्कत देवुळ विळसतद पोल्लोतुहकु दोर्को आवालि. ✨ अब्रहमिहकु इतेके, देवुळि ओन पोल्लो विळसताहके, ताना बर्कत दोर्कता, ✨ बेद उंद अडोतुन माळताहकु आयो.

✨ **3:12 3:12** लैव्यवस्था 18:5; रोम सहरतोर 7:10 ✨ **3:13-14 3:13-14** रोम सहरतोर 4:9-10,16-17 ✨ **3:13-14 3:13-14** बळयिर 2:33 ✨ **3:13-14 3:13-14** 2 कुरिततोर 5:21; गलातितोर 4:5 ✨ **3:13-14 3:13-14** व्यवस्थाविवरण 21:23 ✨ **3:15 3:15** इन्नितोर 6:16 \* **3:16 3:16** कूळतोन्कु मोदुल कागिदते पेनेमतुहक ✨ **3:16 3:16** पुटमुळि 22:18; लूकाल 1:54-55; रोम सहरतोर 4:13,16-17; 9:4 † **3:16 3:16** कूळतोरिहकु मोदुल कागिदते पेनेहकिहकु ‡ **3:16 3:16** कूळतोन्कु मोदुल कागिदते पेनेमतुहकु ✨ **3:17 3:17** पुटमुळि 15:13; पेसमुळि 12:40; बळयिर 7:6 ✨ **3:17 3:17** इपिसुसतोर 2:12 ✨ **3:18 3:18** रोम सहरतोर 4:14-15 ✨ **3:18 3:18** इन्नितोर 6:13-14

19 मोसानाड अडोन पया देवुळि बाराहकु ईता इतेके, अब्रहम मुय्तोना कूळतोन्क, इतेके किर्स्तुहकु, देवुळि पोल्लो विळिसस मता, अयो? ओग वानाहजोम, माट पापमतोरल आय्हनल इदिन पुनदलाहिये, देवुळि माक अडोड वने ईता. ✧ इव अडोनु देवुळ तनाड देवतुल्कना मेटे ईता, ✧ मोसा मुय्तोग अस्के कलियिह केवाल मतोग. ✧

20 कलियिह केवाना गर्ज इंजेके ईवुराये नडुम अरयहता. ✧ देवुळ बारा वगये मन्जि, (बोगे कलियिह केवाल लेवस्के, तनाय कुसिते अब्रहम मुय्तोहकु पोल्लो विळिसता).

मोसानाड अडोड ऊळेवाळे केवानलेहकाडाड

21 अह इतेके मोसानाड अडोड, देवुळ विळिसतव पोल्लोना विस्द मन्हताडा? अद्रम मुर्तिय आयो! माक पिसिह कीया पगयहता, इद्रमता बेदाय अडो मतेके, नितमे अडोन नोमिसिये, माट सेतेमतोरल आवेरल. ✧

22 मति साभ्रम वेहतपु, पूरा दुनिया पापमते दोहतद मन्हता. ✧ पोल्लो विळिसस मतद बर्कत येसु किर्स्तुनगा विस्वस तासतेकेने, माक विस्वसिरिहक दोर्कना इन्जि, ✧ इद्रम आता.

23 मति विस्वसता कालम वायनामुने, माकु यहूदिराड अडोड राका कीतप आंदुड. इतेके विस्वसता अगि पुनाहजोमु, माट दोहतप लेहका मंदल. ✧

24 इतेके किर्स्तुन नमिसिये माट सेतेमतोरल आयना ✧ इन्जि, ओग वानाहजोम, अडोड इतेके माक ओवोर्ग ऊळेवाळे केवानलेहकाने आंदुड. ✧ S

25 पया विस्वसता कालम वातस्के, इंजेके ऊळेवाळे केवाना इळन माट इलवल.

26 मीट कतमतोरिर इतेके, किर्स्तु येसुन नमताहकु, देवुळताड मगक-मयास्कनिर आय्हनिर. ✧

✧ **3:19 3:19** रोम सहरतोर 5:20 ✧ **3:19 3:19** बळयिर 7:53 ✧ **3:19 3:19** पेसमुळि 20:19; व्यवस्थाविवरण 5:5 ✧ **3:20 3:20** 1 तिमोति 2:5; इब्रितोर 8:6; 9:15; 12:24 ✧ **3:21 3:21** 2:21; इब्रितोर 7:18-19 ✧ **3:22 3:21-22** रोम सहरतोर 3:20 ✧ **3:22 3:22** रोम सहरतोर 3:21-23 ✧ **3:23 3:22-23** रोम सहरतोर 11:32 ✧ **3:24 3:24** रोम सहरतोर 9:30; गलातितोर 2:16 ✧ **3:24 3:24** रोम सहरतोर 10:3-4

S **3:24 3:24** रोमि साव्कर लोकर तमाड उडुलोर पिलाड-पेकोरिहक बुद तेळियनाहजोम, ओरिन ऊळेवाळे कीयलाह, ओसो ओरिन बुद काहतलाह ओर्युलतोरिन तासिदुर. अद्रमलेहकाने साभ्रमताड अडोड वने, येसु किर्स्तु वानाहजोम, ऊळेवाळे केवाना लेहका मताड. ✧ **3:26 3:26** रोम सहरतोर 8:14; गलातितोर 4:5

27 इतेके किर्स्तुना पेदिरते एतगा मुळिन्दस तेदतोर, ओर कतमतोर किर्स्तुना संगे जोळेम आसि, ओन केगतप लेहका आस्तोर.✧

28 यहुदि जाततोग आयेग, दुस्रा जाततोग आयेग, ओर्युलतोग आयेग, माल्काल आयेग, आंचाळ आयि, कोय्तोग आयेग, इद्रम उड्लोग-बेरोग बातय इले; मीट सबेटोर विस्वसिरि इतेके, किर्स्तु येसुना राजेमते उंदिय महनिर, इदिन सीता कीम्हटु.✧

29 मीट किर्स्तुना संगे जोळेम आतोरिर इतेके, मीट अब्रहम मुय्तोना कूळतोरिर आंदिर, अहे देवुळ अब्रहमिन पोल्लो विळसतपु, तानाड मग्क-मयास्किहक तासतद बर्कत दोर्कतोरिर.✧

## 4

माट ओर्युलतोरल आयवल, देवुळताड मग्कनले

1 देवुळता बर्कत दोर्कतोरिर इतेके बहु? इंजेके साक्करना तूस एनवाल मगि, बेचानाह उड्लोग मन्हतोग, अचानाह ओग पूरा लोता सम्सरमता माल्काल मन्ज तेला, तान काळडलाह ओन्क बातय अदिकर इले, ओर्युलतोना लेहकाने मन्हतोग.

2 तपे वेहतद कगो एवनाहजोम, ओना पोगोन ऊळेवाळे केवालोर, मालसोमता जबब्दर एनवालोर मन्हतोर.

3 अद्रमलेहका माट वने, उड्लोरा लेहका पुनवोरल मतस्के, दुनियाताड अडूळमताड उत्र्कना लेकाने,✧ माट एगकिस मंदल.✧

4 पया देवुळ वेहतद कगो एवतस्के, अदु तना मगिन इद बूमते लोहता.✧ ओग आंचाना पोटाताहि पुटटोग,✧मोसानाड अडोड नोमवालोर यहुदि जाततोरगा पुट वातोग.✧

5 अडोना नोमळते दोहतप मतोरिनु लेहतना इन्जिये, देवुळता मगि वासि, तना जीवा ईतोग.✧ माट वने देवुळताड मग्क-मयास्क आयना इन्जिये, ओगु माक विळिसह कीतोग.✧

✧ **3:27 3:27** रोम सहरतोर 6:2-4 ✧ **3:28 3:28** योहन 17:11; रोम सहरतोर 3:21-23,29; इपिसुसतोर 2:14-15; पिलेमोन 16 ✧ **3:29 3:29** रोम सहरतोर 4:13; 8:17; गलातितोर 4:28; 6:16 ✧ **4:3 4:3** कुलुसितोर 2:8,20-22; इब्रितोर 5:12 ✧ **4:3 4:3** रोम सहरतोर 7:14; 2 कुरिततोर 11:20; गलातितोर 4:24-25 ✧ **4:4 4:4** मार्कल 1:15; रोम सहरतोर 5:6 ✧ **4:4 4:4** योहन 1:14; रोम सहरतोर 1:3-4; 8:3 ✧ **4:4 4:4** लूकाल 2:21-24,27 ✧ **4:5 4:5** रोम सहरतोर 10:3-4 ✧ **4:5 4:5** रोम सहरतोर 8:14; गलातितोर 3:13-14,26

6 माट देवुळताड मगकनल आताहकु, देवुळि तना मगना जीवातुन, मावा जीवातगा लोहता. ✨ अद जीवा अगा देवुळतुन “बाबा! बाबा!” इनजोर केयसोर मन्हता. ✨

7 अदिनेनाहक माट इंजेके ओर्युललेहकाडोरल मुर्तिय आयवल, मति मगकनल. माट मगकनल आतल इतेके, देवुळबाबाना बर्कत माक दोर्कगाये! ✨ इद पूरा कबळ देवुळिये कीता.

पोलु गलातितोरेनाहक आलिह कीस्तोग

8 मति मुने मीट सेतेम देवुळतुन पुनवाहकु, जोल देवुळकना कय इळन मतिर. ✨

9 इंजेक बार मीट देवुळता एरे वातिर (आयो, देवुळिये मीक एरे कीता), मीट बेद्रमि दुनियाताड अडुळमताड पायदालेवाड उतुर्कना पेगे, ✨ ओसो मल्स दायलाह आतिर? अविस्कना लोकाने बेद्रम मीट ओसो एकलाह ऊळिहनिर? ✨

10 इतेके वारमतनु, नेलानु, पोल्वानाड कगोन, वर्सानु, मीट नोमिहनिर. ✨

11 नना मियगा बेद कहटेम कीतन, अद पूरा उगसे अता बहे इन्जि, नना मियेनाहक आलिह कीयहनन. ✨

12 मति बेद्रम नना मीवा लेहका अडोन नोमवोनन आतन, ✨ अद्रमे मावोरिर, मीट वने नावा लेहका आम्हटु. अडोनेके मलमाटु इन्जि, नना मीवाड काल्क अरयहनन. इचानाह नाक बेस्केन मियेनाहि तिपल वावो.

13 नाकु दुक अरताहके, नना मियगा मुने वास मतन. वासि मीकु किर्स्तुना बेसता कबुर वेहता पगतन, इदिन मीट पुतिर.

14 अस्के नावा दुकतेनाहक, मीकु तिपल आस तेला, मीट नाक सेट्बेट ऊळविर. ✨ मति लोन देवतुल वातपे, नाकु बेस ऊळतिर, किर्स्तु येसु कुदि लोन वातपे ऊळतिर. ✨

15 नयेनाहकु मीटु बेदाय सेवा कीयलाह तयर मंदिर, अचोन नावा पोगोन जीवा कीदिर इन्जि, नना मीवा लोप्पा वेहता पगयकन! आया पगतेके, मीट मीवाड कोंडाड इका तेंडिस नाक एवेरिर! मीवा अद मुनेता गिर्दा बह आसि मायता?

✨ 4:6 4:6 रोम सहरतोर 5:5; 8:9,16; 2 कुरिततोर 3:17 ✨ 4:6 4:6 मार्कल 14:36; रोम सहरतोर 8:15 ✨ 4:7 4:7 रोम सहरतोर 8:17 ✨ 4:8 4:8 इपिसुसतोर 2:12; 1 तिसलुनितोर 4:5; 2 तिसलुनितोर 1:8 ✨ 4:9 4:9 4:3; कुलुसितोर 2:20-22 ✨ 4:9 4:8-9 2 कुरिततोर 11:20 ✨ 4:10 4:10 रोम सहरतोर 14:5; कुलुसितोर 2:16 ✨ 4:11 4:11 पिलिपितोर 2:16 ✨ 4:12 4:12 1 कुरिततोर 9:22 ✨ 4:14 4:13-14 2 कुरिततोर 10:10 ✨ 4:14 4:14 मत्याल 10:40; 1 तिसलुनितोर 2:13; इब्नितोर 13:2

16 इतेके नना मीक्कु सेतेमताड पोल्लोड वेहचि, मीवा कोंटेतोन्न आतन बहे!☆

17 ओर जोल कबुर वेहवालोर बार, मीक गोत कीयलाह ऊळिहतोर, मति मीवा पाय्दातेनाहक आयो; मीट ओराये मुडगा कलियना इन्जि, मयगडाहि मीक्कु अलग कीयलाह ओर ऊळिहतोर.

18 मीक गोत कीयना इतेके, मीवा पाय्दातेनाहक कीतेके बेसु! नना मियगा मतस्के, अहे कींदन. मति नना अगा मनवेक वने, दुस्रोर मीवा पाय्दातेनाहक गोत कीतेके बेस आवालि.

19 इंगो रा, इह केंजाट बाबा, किर्स्तुना बुदि मियगा पुटनाहजोम,☆ रिक्कम आयनद मगतलिना पोटातगा आतप लेहका, नावा पोटातगा मळमळ आस्ता.☆

20 इंजेके मीवा इद कट्टलातेनाहकु, नना एक्बेक आतन.☆ अदिहकु मियगा वासि अलग रीतते वळ्हेकेनन, इद्रम नावा गिर्दा मन्हता.

अब्रहमनाड मुतेस्क माक बाताल तोहतहताड

21 मीट मोसानाड अडोड माळवालोरिर केंजाट, सास्त्रमते मोसा मुय्तोग बाताल रासतोग, तान पुनविरा?☆

22 अब्रहम मुय्तोहकु ईवुर पेकोर पुटटोर, ओर्वोंग इतेके ओर्युल आंचाना पोटाताहि पुटटोगु, दुस्रोग बार ओर्युल आयवद मोदुल मुतेना पोटाताहि पुटटोगु☆ इन्जि, सास्त्रम वेहतहता.

23 मति ओर्युल आंचाना पेकाल इस्मालि इतेके, मन्कना विचरतेने पुटटोग आंदोग; मोदुल मुतेना पेकाल बार, देवुळ विळसतद पोल्लोतुहक पुटटोग आंदोग, (ओग मावा पेदामुय्तोग इसकि).☆

24 इव पोल्लोड इतेके, पुन्पिह कीयनव पोल्लोड आंदुड.☆ इतेके इव रेंड आस्कु, रेंड करल्कना लेहका आंदुड. उंद करल इतेके, सीनय इनदनद मेटाता करल आंदु☆(अगाने देवुळि इप्पयेल लोक्किरिहक दहा अडोड ईसि करल कीता)☆. इद करल इतेके, आगर इनदनद ओर्युल आंचाना लेहका, ओर्युल पेकोरिने पुटिह कीस्ता.

☆ 4:16 4:16 आमोस 5:10 ☆ 4:19 4:19 इपिससतोर 4:13 ☆ 4:19 4:19 1 कुरिततोर 4:15; 1 तिसलुनितोर 2:6-7 ☆ 4:20 4:20 2 कुरिततोर 4:8 ☆ 4:21 4:21 रोम सहरतोर 6:14 ☆ 4:22 4:22 पुटमुळि 21 ऊळाट. ☆ 4:23 4:23 पुटमुळि 17:16-19; 18:10-14; 21:1; रोम सहरतोर 9:7-9; इब्रितोर 11:11 ☆ 4:24 4:24 1 कुरिततोर 10:11 ☆ 4:24 4:24 व्यवस्थाविवरण 33:2 ☆ 4:24 4:24 पेसमुळि 19—20 ऊळाट.

25 (इद सीनय मेटा इतेके, अरब देसेमते मन्हता.) अद ओर्युलतद आगर इतेके, इद दुनियाता येस्सलेमतोरा लेहका आंदु. बह इतेके, येस्सलेमतोर यहुदिर वने, सीनय मेटातगा ईतव अडोना कय इळन मन्हतोर.✧

26 देवुळदीपता येस्सलेम बार, ओर्युल आयवद मोदुल मुतेनलेहका मन्हता, (तानाड पेकोर ओर्युलतोर आयोर). अदु माट विस्वसिरा तलोग आंदु, देवुळदीपता येस्सलेम.✧

27 सास्त्रमते रासतपु,

एय मगामियाळ आयवद वंजो आंचानिन, निमा गिर्दा कीम.

ओ पुटिह केवद आंचानिन, निमा गिर्दाते केया.

बह इतेके वंजो आयवद आंचानाड पेकोरिहकाय वीळिसि,

वंजो आंचानाड पेकोर वेल्लाटोर मन्हतोर.✧

28 मावोरिर, मीट वने इंजेके इसकिनलेहका देवुळ विळसतद पोल्लोतेनाहके, तानाड मगनिर आतिर, मन्कना विचरतेनाहक आयो.✧

29 मति अस्के मन्कना विचरते पुटटोग पेकाल, देवुळ विळसतद पोल्लोते पुटटोग पेकानु, बेद्रम कुळसा अंदोग✧, अद्रम नेंड वने मन्हता.✧

30 मति सास्त्रम बाताल वेहतहता? ओर्युल आंचाना पेकाहकु, मोदुल मुतेना पेकाना सगे तपेना तूस मुर्तिय दोर्को आयगा. अदिहकु ओर्युलतदिन, ताना पेकानु पलत पेहचीम!✧ इनजोर वेहतहता.

31 इतेके मावोरिर, माट ओर्युलता लेहकाडाड अडोनाड मगनल आयवल, मति ओर्युल आयवद लेहकाडा विस्वसताड मगनल आंदल.

## 5

1 ओसो माट अडोना इळन ओर्युलतोरा लेहका मनदनदायो इन्जिये, किर्स्तु माक पिहट अर्हतोग. अदिनेनाहकु मीवा विस्वसते मीटु मेगिकिस मन्हटु,✧ मति मीट ओर्युलतोरा लेहका, पूहतद अडोना जुवा कांजमाटु.✧

डायना रिंज केमाटु!

✧ 4:25 4:24-25 4:3 ✧ 4:26 4:26 इब्रितोर 12:22; तोहचीतव पोल्लोड 3:12; 21:2,10 ✧ 4:27 4:27 यशायाह 54:1 ✧ 4:28 4:28 रोम सहरतोर 9:7-11; गलातितोर 3:29 ✧ 4:29 4:29 पुटमुळि 21:9; योहन 8:35 ✧ 4:29 4:29 5:11 ✧ 4:30 4:30 पुटमुळि 21:10,12 ✧ 5:1 5:1 1 कुरिततोर 16:13 ✧ 5:1 5:1 योहन 8:32,36; बळयिर 15:10; रोम सहरतोर 8:15; 11:20; गलातितोर 2:4

2 ननान पोलुनन मीक वेहतहनन, बेस केंजाटु! मीट यहुदिरा डायना रिजतुन नोममाटु. अह कीसि सेतेमतोर आयलाह ऊळतेके, किर्स्तुना मोकि मीकु बातय पायदाता आयो आयगा.✧

3 पया डायना रिज माळवालोरिहक सिरप इद अडोटुन आयो, मति यहुदिराड कतमे अडोन नोमिय पोयतगा इन्जि, नना सेतेम वेहतहनन.✧

4 मीट अडोन नोमिसि सेतेमतोर आयलाह ऊळवालोरिर, किर्स्तुनाहि अलग आतिर, ओना दयातुन पोहचीतिरे!✧

5 नना इद्रम बाराहक इहनन? माट विस्वसिरल इतेके किर्स्तुन नमिसिये सेतेमतोरल आतल; सेतेमतोरिनाहकु देवुळि तासतद बर्कतता आसाते माट महनल.✧ इद आसा देवुळता जीवातगडाहिजे वास्ता.

6 इतेके किर्स्तु येसुन नमतेके, डायना रिज कीयनदु बार आयो, केवद वन बार आयो;✧ येसुनगा विस्वस तासिसि, दुसोरिन जीवा कीयना, इदे मोदुल पोल्लो आंदु.✧

7 मीट मुने विस्वसते बेस विततप आंदिर. मति इंजेक इसि, बोगो मीवा अगदे अडम वाताहके, येसुना सेतेम अगदे मीट ताकविर, इद बेस आयो!

8 इद्रमता नाळेह कीयनद बुदि इतेके, मीक आचतद देवुळताहि✧ वावो.

9 ओयिपेह कीतद इचुने पिंडटुन, कोपामेंड नाहतद पिंडटगा काल्हपतेके, पूरा पिंडि ओयिहता, इद पोल्लो इतेके मीट केंजतिरे;✧(ओरा जोल कबुरतुन नमतेके अहे आयगा.)

10 मीट वने नावा पोल्लोतुन कबुल कीकिरे इन्जि, देवुळतेनाहि नावा बर्वस मन्हता.✧ मीक तिपल केवाल पया, बोगे मनेग, ओन्क देवुळता सिक्सा दोर्कगाये.✧

11 इंजेके नाक इंका डायना रिजता पोकुर कीस्तोग इन्जि, उयतुर इन्हतोर. मावोरिर, नना इद्रम पोकुर कीतन इतेके, यहुदिर नाक विस्व केवोर आवेर.✧ हक्कनागुटातगा येसुसामि ईतद मोकतेनाहके पिसमुळ दोर्किहता इन्जि, नना पोकुर कीताहकेने, यहुदिर नाक पका ओड आस्तोर.✧

✧ 5:2 5:2 बळथिर 15:1 ✧ 5:3 5:3 रोम सहरतोर 2:25; याकुब 2:10 ✧ 5:4 5:4 रोम सहरतोर 9:31; 1 कुरिततोर 7:18; इब्रितोर 4:1; 12:15; 2 पत्रु 3:17 ✧ 5:5 5:5 1 कुरिततोर 1:5-7 ✧ 5:6 5:6 6:15; कुलुसितोर 3:11 ✧ 5:6 5:6 1 कुरिततोर 7:19; 13:13; कुलुसितोर 1:3-5; 1 तिसलुनितोर 1:2-3; याकुब 2:17 ✧ 5:8 5:8 रोम सहरतोर 8:28; गलातितोर 1:6 ✧ 5:9 5:9 मत्याल 16:6,12; 1 कुरिततोर 5:6 ✧ 5:10 5:10 पिलिपितोर 3:15 ✧ 5:10 5:10 1:7 ✧ 5:11 5:11 4:29; 6:12 ✧ 5:11 5:11 रोम सहरतोर 9:33; 1 कुरिततोर 1:23; गलातितोर 3:1

12 मीक डायना रिबज कीम्हटु इनजोर तिपल केवालोर, तम्क कुदिय कतमे डायिस पोहतेके, बायलालोर लेहका आतेक बेस आवालि!

मन्कना बुदि ओसो देवुळता जीवाता बुदि

13 मति मावोरिर, मीक इतेके, अडोना जुवाताहि पिहट अरयलाह देवुळ केयता. ✧ अदिहक नना इद्रम रासिहनन. मीट मात्रम माट विचर वातप कीकोम, इद्रम इनदनदायो मति, जीवा कीसि मीट ओर्विना-ओर्वोग सेवा-साकुर कीम्हटु. ✧

14 बाराहक इतेके, मोसानाडः सबे अडोडः साम्मता उंदिय पोल्लोते माळतप आताडः, अद बेद इतेके निमा कुदतुन जीवा कीतपु, दुसोरिन जीवा कीम. ✧

15 मति मीट ओर्विहक-ओर्वोग नल्हतना, कोहकना, वहचना कीसोर महनिर! इदिनेनाहकु आक्रिते मीट ओर्विन-ओर्वोग बूळे कीयनदायो इन्जि, उसरते मन्हटु.

16 इंजेके नना वेहतहनन, बेस केंजाटु! देवुळता जीवा मीक बह ताकिह कीस्ता, अहे ताकाटु; अस्के मीवा मन्कना बुदते, मीट मुर्तिय ताकविर आयकिर. ✧

17 बह इतेके मावा मन्कना बुदि, देवुळता जीवाता अडम मन्हता; ओसो देवुळता जीवा इतेके, मावा मन्कना बुदता अडम मन्हता. इव रेंड इतेके बेस्केन ओडोडः, अदिहक मीक बेद कीयना विचर मन्हता, अदिन मीट कीया पगविर. ✧

18 पया बेचानाह मीक देवुळता जीवा ताकिह कीस्ता, ✧ अचानाह मीट अडोना इळन इलविर. ✧

19-21 इंजेके मावा मन्कना बुदताडः कबस्किन माट पुहनले. अव आंदुडः सिंङ्गि-साट्याल आयना, लजालेवा विचर वातप कीयना, ✧ बोमापूजा, ओदे, कोंटेडः, वहचळि, कोंडा वेयना, ओडु; ✧ दुसोरा सीता केवा कुदताये पाय्दातुन ऊळनदु, ✧ मुडा नडुम पूटपट कीयना, ✧ कुळसा, कल लोटि आयना, इद्रमताडः वेल्लाडे पोल्लोडः मन्हताडः. ✧ इद्रमताडः कबस्किन केवालोरिहक इतेके, देवुळता राजेमते

✧ **5:13 5:13** 2 कुरिततोर 3:17; गलातितोर 2:4 ✧ **5:13 5:13** 1 कुरिततोर 8:9; 9:19; इपिसुसतोर 5:21; 1 पत्र 2:16 ✧ **5:14 5:14** लैव्यवस्था 19:18; मत्याल 7:12; 22:40; रोम सहरतोर 13:8-9,10; गलातितोर 6:2 ✧ **5:16 5:16** रोम सहरतोर 8:4; 13:14; इपिसुसतोर 2:3 ✧ **5:17 5:17** रोम सहरतोर 7:15,17-20,23; 8:5-8 ✧ **5:18 5:18** रोम सहरतोर 8:14 ✧ **5:18 5:18** रोम सहरतोर 6:14; 1 तिमोति 1:9-10 ✧ **5:19-21 5:19-21** 1 कुरिततोर 6:9,18-20 ✧ **5:19-21 5:19-21** 2 कुरिततोर 12:20; 1 योहन 3:15 ✧ **5:19-21 5:19-21** रोम सहरतोर 2:8 ✧ **5:19-21 5:19-21** 1 कुरिततोर 1:11-12 ✧ **5:19-21 5:19-21** रोम सहरतोर 13:13



जागा मूर्तिय दोर्को आयगा. ✧ इद पोल्लो नना मुनेन वेहतन, अद्रम इंजेक ओसो मीक वेहतहनन.

22-23 देवुळता जीवा बारा, मावा जीवातगा मोन्हटटेके, मयगा इद्रमता पंटा पुटिहता: ✧ माट दुसोरिन जीवा कीयहनल, माट गिर्दाते महनल, ✧ सुकमते महनल, ✧ बेदाय पोल्लोतुहक चट्ने ओड आयवा महनल, दुसोरिन जीवा वाटिहनल, माट चिक्टमलेवा महनल, माट पोल्लो विळसतपे कीयहनल, कुलुल बुदते ताकिहनल, कुदतुन आत्रे कीयहनल. ✧ इद्रम ताकतेके, माक यहुदिराड अडोड अडम आयोड. ✧

24 इंजेके किर्स्तु येसुन नमवालोर इतेके, तमा मन्कना बुदतुन, हक्कनागुटातगा बूळे कीतपे मन्हतोर; अद मन्कना बुद डोलता इतेके, माट तानाड लागवाड विचर्कने ताकवल. ✧

पवित्र जीवाता पेगके ताकना

25 इद्रमलेहका देवुळता पवित्र जीवाते माट पिसिहनल, अहे अद जीवा माक ताकिह कीतपु, माट ताना पेगके ताकिड वने. ✧

26 नना बेरोनन इन्जि, माट मनवल आयकल, इतेके ओर्विन-ओर्वोग लजा केवल, ओर्विहक-ओर्वोग कुळसा केवल. ✧

## 6

1 मति मावोरिर, ओर्विना-ओर्वोग सेवा कीम्हट्ट. बोगाय मीवा ऐगेटोग विस्वसि पापमते एकतदिन ऊळतेके, बोर पवित्र जीवाता पेगके ताकवालोरिर महनिर, ✧ मीट ओनगा अन्जि, कुलुल बुदते ओनु सेतेमता अगदे ताट्ट. ✧ मति ततहपा, मीट वने अद्रमता पापमते एकनदायो इन्जि, उसरते मन्हट्ट.

2 मीट ओर्विना-ओर्वोग तिपलतुन-मोतातुन कांजाट्ट. इदे रीतते किर्स्तु वेहतद अडोतुन माळकिर ✧.

✧ 5:19-21 5:19-21 1 कुरिततोर 6:9-10 ✧ 5:22-23 5:22-23 मत्याल 7:16-20

✧ 5:22-23 5:22-23 1 तिसलुनितोर 1:6 ✧ 5:22-23 5:22-23 रोम सहरतोर 14:17

✧ 5:22-23 5:22-23 रोम सहरतोर 5:1-5; कुलुसितोर 3:12-15 ✧ 5:22-23 5:22-23

1 तिमोति 1:9-10 ✧ 5:24 5:24 रोम सहरतोर 6:6; गलातितोर 2:20; 6:14; 1 पत्र 2:11

✧ 5:25 5:25 रोम सहरतोर 8:4; मिलिपितोर 3:3 ✧ 5:26 5:26 मिलिपितोर 2:3 ✧ 6:1

6:1 1 कुरिततोर 2:15; 3:1 ✧ 6:1 6:1 1 कुरिततोर 4:21; 2 कुरिततोर 2:7; 2 तिसलुनितोर

3:15; 2 तिमोति 2:25; इब्रितोर 12:13; याकुब 5:19 ✧ 6:2 6:2 योहन 13:34; रोम सहरतोर

12:13; 1 कुरिततोर 9:21; गलातितोर 5:14; याकुब 1:25; 2:12

3 बोगाय विस्वसि केनकेनेतोग मन्जि, नना दुस्रोर्काय बेरोनन इन्जि, दुस्रोरा सीता केवोग इतेके, ओना विचर चुकिहता.✧

4 मति मीट ओर्वोग-ओर्वोग दुस्रोनाड कबस्किन जोकवा, आप-आपुनाड कुदताड कबस्किन जोकनदु.✧ अस्के नीवाडे कबस्किन ऊळिसि, नना बेद्रमतोनन इन्जि पुनदकिन. मति दुस्रोर्काय बेरोनन इनदा वावो.

5 बाराहक इतेके देवुळ नीके ईतद जबब्दरतुन, निमा एतना गावले.✧

6 देवुळता पोल्लो केंजवालोर, तमा सबे बेसता मालसोमता कोडि, पोल्लो काहवालोरिहक ईयिर.✧

7 ओसो मीट नाळेम आयमाटु. देवुळि मावाड कबस्किन ऊळो, नेयम केवो इन्जि, देवुळतुन बोगे नाळेह कीया पगवोग.✧ इतेके मीट बेव वीतिहनिर, अविने कोयकिर.✧

8 इतेके बोर तमा मन्कना बुद वेहतपु, लागवाड कबस्क वीतिहतोर, ओरिहक अदे मन्कना बुदतुहकु, बूळेम आयनद सिक्साता पंटा दोर्कगा.✧ बोर बार देवुळता जीवा वेहतपु बेसताड कबस्क वीतिहतोर, ओरिहक देवुळता जीवाये ईतदु अमेसाता पिसमुळता पंटा दोर्कगा.✧

9 अद्रमे माट बेसताड कबस्क कीयलाह, बेस्के लंडा आयनदायो. इद्रम माट ओरम आयवेके,✧ देवुळ तासतद कगोते माक अव कबस्कना पाय्दा दोर्कगा.✧

10 अदिनेनाहकु माक बह मोका दोर्किहता, अह माट सबेटेरिनाहक बेसताड कबस्क कीयिड,✧ कास कीसि मावोर विस्वसिरेनाहकु. (इद्रमलेहका माट देवुळता जीवाता पेम्के ताकना गावले.)

देवुळतगडाहे कदर पर्हकनदु

11 इंजेके इव आक्रिताड पोल्लोड, नना नावाय कुदता कयदे रासिहनन.✧ अदिहक मीक इगा बेराड-बेराडे अक्सर्क दिसिहताड.

✧ **6:3 6:3** बळयिर 5:36; रोम सहरतोर 12:3; 1 कुरिततोर 3:18; पिलिपितोर 2:3-4 ✧ **6:4 6:4 1** कुरिततोर 11:28 ✧ **6:5 6:5** रोम सहरतोर 14:12; 1 कुरिततोर 3:8 ✧ **6:6 6:6 1** कुरिततोर 9:11,14 ✧ **6:7 6:7** अय्यूब 13:9 ✧ **6:7 6:7 2** कुरिततोर 9:6 ✧ **6:8 6:8** अय्यूब 4:8; होशे 8:7; रोम सहरतोर 6:21-22 ✧ **6:8 6:8** रोम सहरतोर 8:11; याकुब 3:18 ✧ **6:9 6:9 2** तिसलुनितोर 3:13 ✧ **6:9 6:9** मत्याल 10:22; मार्कल 13:13; लूकाल 21:19; 1 कुरिततोर 15:58; 2 कुरिततोर 4:1; 9:6; इब्रितोर 12:3 ✧ **6:10 6:10** बुदताड पोल्लोड 3:27; 1 तिसलुनितोर 5:15 ✧ **6:11 6:11 1** कुरिततोर 16:21; कुलुसितोर 4:18; 2 तिसलुनितोर 3:17; पिलेमोन 19

12 बोर यहुदिरा मान दोर्किह कीयलाह ऊळिहतोर, ओरे मीकु डायना रिवज कीयलाह जबर्दस्त कीस्तोर. ✨हक्कनागुटातगा ईतद मोकतेनाहके माट देवुळतगा सेतेमतोरल आय्हनल, इद्रम पोकुर कीतिके, यहुदिर माक विस्द कीयनुर इन्जिये, ओर मीकु इद्रम कीया वेहतहतोर. ✨

13 बह इतेके डायना रिवज नोमवालोर कुदि मोसानाड अडोन माळोर आस्तोर. ✨ मीट ओराड केंजिसि, डायना रिवज कीतिर इतेके, ओर पोगयना इन्जिये ओरु मीकु डायलाह वेहतहतोर. ✨

14 नाक बार अद्रमता दुनियातोरा कदर मुर्तिय गावल आयो; मति नना हक्कनागुटातगा हातोग सामि येसु किर्स्तुन नमवानन इन्जिये पोगयिहनन. अद हक्कनागुटातेनाहके, इद दुनियाताड पोल्लोड नाक पट अरवोड, अहे नावा ताकमुळि दुनियातोरिहकु पट अरवो. ✨

15 नाक अद्रमता कदर गावल आयो, बह इतेके डायना रिवज कीयनद वन बार आयो, केवद वन बार आयो; देवुळि मावा लोप्पा पूना जीवा पुटिह कीता, अदे मोदुल पोल्लो आंदु. ✨

16 इद पोल्लोते बोर ताकनुर, ओर सबेटोरिहकु देवुळि सुकम ईयि, ओसो किर्स्तुन नमवालोर इस्रयेलतोरा पोगोन इंका, ✨ देवुळि दया कीयि. ✨

17 ओसो इंजेटाहि मियगडाहि बोगे जोल कागहमुळतुन केंजिसि, नाक तिपल कीयनदायो. बाराहक इतेके येसुसामिना कबुरतुन पोकुर कीताहकु, विस्दतोरा देबाना सीना नावा मेंदुदगा मन्हता. ✨

18 मावोरिर, येसुसामि किर्स्तुना देखा मियगा मनि. ✨आमेन.

✨ 6:12 6:12 बळयिर 15:1 ✨ 6:12 6:12 5:11 ✨ 6:13 6:13 रोम सहरतोर 2:25

✨ 6:13 6:13 पिलिपितोर 3:3 ✨ 6:14 6:14 रोम सहरतोर 6:6; गलातितोर 2:20; 5:24;

पिलिपितोर 3:18; कुलुसितोर 2:20-22 ✨ 6:15 6:15 रोम सहरतोर 2:26,28; 6:2-4;

गलातितोर 5:6; इपिसुस्तोर 2:10,15; पिलिपितोर 3:3 ✨ 6:16 6:16 रोम सहरतोर 9:6;

गलातितोर 3:7,29 ✨ 6:16 6:16 1 पत्रु 1:3; यहुदाल 2 ✨ 6:17 6:17 2 कुरिततोर

4:10; 11:23-25 ✨ 6:18 6:18 रोम सहरतोर 16:20

**Hill Madia**  
**Hill Madia standard translation**

copyright © 2021 Wycliffe Bible Translators, Inc.

Language: (Maria)

Contributor: The Seed Company

All rights reserved.

2025-05-15

---

PDF generated using Haiola and XeLaTeX on 14 May 2025 from source files  
dated 15 May 2025

9f0bdb58-21f8-514e-8286-5b2942b7d458